



Gemeinsam Äntwert vum Minister fir Ëmwelt, Klima a Biodiversitéit an dem Inneminister op d'parlamentaresch Fro n°3207 vum 18. November 2025 vun den éierewäerten Deputéierten Jeff Engelen an Tom Weidig iwwert "Procédures d'intervention face aux frelons asiatiques"

1) Ass déi éischt Ulafstell bei Problemer mat esou invasiven Aarten nach ëmmer d'ANF (Administration de la nature et des forêts)?

D'ANF ass nach ëmmer déi éischt Ulafstell fir vill invasiv Aarten, am Fall vun der *Vespa velutina* z. B. besonnesch wann et ëm d'Melde vu Näschter oder Observatioune vun där Aart geet. Allerdéngs ass d'ANF net automatesch fir all invasiv Aart zoustänneg. Jee no Aart, hirem Liewensraum, hirem Verbreedungsgebitt an de méigleche negativen Impakter kënnen och aner Verwaltungen zoustänneg sinn. Et ass dofir wichteg, de Kontext an d'Aart am Einzelnen ze betruechten; d'ANF kann an esou Fäll awer meeschtens als éischt Kontaktstell déngen an d'Dossieren un déi kompetent Instanze weiderleeden.

2) Kann d'ANF sech selwer ëm d'Ewechhuele vun dësen Näschter këmmen oder mussen si déi Aarbechte weiderginn?

D'ANF neutraliséiert aktuell d'Näschter, déi sech op ëffentlechem Terrain befannen a wou am direkten Ëmkrees eng Gefor fir Mënsche besteet, z. B. bei Schoulen, Altersheimer oder Bushaltestellen. Am Prinzip ginn d'Näschter op Privatterraine net vun der ANF neutraliséiert. D'Privatleit kréie geroen, sech un eng Firma ze wenden.

3) Wee muss fir d'Käschten opkommen, wann e Privathaus oder e Privatterrain beträff ass?

D'Privatleit mussen op hirem Terrain selwer fir déi Käschten opkommen.

4) Wat sinn déi prozedural Ënnerscheeder bei asiateschen Hornissen am Verglach mat eisen europäeschen Harespelen, déi jo geschützt sinn?

D'Berodung am Fall vun eenheemeschen Harespelsaarten iwwerhëllt natur&ëmwelt (Haus vun der Natur), wou et virun allem dorëms geet Konflikter an der Koexistenz tëscht Insekt a Mënsch ze reduzéieren a just an extreeme Fäll Näschter ewech ze huelen. Bei *Vespa velutina*, enger exotescher invasiver Aart, iwwerhëllt d'ANF d'Berodung. Hei geet et dorëm ze wësse wou Näschter sinn an se ewech ze maache wou ëmmer et geet wann d'Ressourcen et zouloossen.

5) Ginn et Fäll, wou de CGDIS, also d'Pompjeeën, mussen oder kënnen agräifen, wann et dréngend ass?

D'Ewechmaache vu Näschter vun der Asiatescher Runn fält opgrond vum modifizéierte Gesetz vum 27. Mäerz 2018 iwwert d'Organisatioun vun der ziviller Sécherheet an dem *Règlement opérationnel* vum CGDIS net ënnert d'Missioun vum CGDIS.



De CGDIS ass aus deem Grond och net fir esou eng Missioun equipéiert a speziell forméiert. De CGDIS intervenéiert just punktuell op Demande vun der ANF, ënnert der Form vun der sougenannter „Amtshilfe“, dëst fir d'ANF logistesesch ze ënnerstëtzen, an dann och nëmme mat spezifesch Moyenen, déi just de CGDIS huet.

D'Interventioun an der Abtei Neumünster, déi d'Deputéiert an hirer Fro erwänen, ass e gutt Beispill. D'Spezialiste vun der Héichterettungsekip vum CGDIS (*groupe de reconnaissance et d'intervention en milieu périlleux (GRIMP)*) waren op Ufro vun der ANF intervenéiert, fir d'Personal vun der ANF an dësem konkrete Fall ze sécheren, well d'Nascht, wat huet missen ewechgemaach ginn, un der Spëtzt vum Kierchtuerm situéiert war.

6) Déi richteg Informatiounen schéngen nach net iwwerall am Land ukomm ze sinn. Wéi plangt d'Regierung an deem Kontext ze kommunizéieren, fir dësen Zoustand ze verbesseren?

De Plan d'action fir d'*Vespa velutina* gëtt an Zesummenaarbecht mat der ALVA, der ASTA (MAAV) an der ANF (MECB) iwwerschafft. Do wäert och d'Verbesserung vun der Kommunikatioun en Thema sinn, fir datt déi néideg Informatiounen fir d'Saison 2026 prett sinn.

Lëtzebuerg, den 2. Januar 2026
(s.) Serge Wilmes
Minister fir Ëmwelt, Klima a Biodiversitéit